

Naqqiut

Akissuteqaat 10. november 2021-meersoq taarserpaa
(UKA 2021-miit UPA 2022-mut oqaluuserisassap kinguartinneqarnerata malitsigisaanik
naqqiisoqarpoq)

Qanoq iliornikkut eqqumiitsuliornermut isiginnittariaaserput kulturiinnarmut sunngiffimmilu suliassaannartut attuumassuteqarunnaartillugu, annerusumik inuussutissarsiuutitut akuerisaanerulersissinnaanera pillugu apeqquteqaat aallaavigalugu oqallissiaq.

(Inatsisartunut ilaasortaq Aqqalu Jerimiassen, Atassut)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalackersuisoq)

Qanoq iliornikkut eqqumiitsuliornermut isiginnittariaaserput kulturiinnarmut sunngiffimmilu suliassaannartut attuumassuteqarunnaartillugu, annerusumik inuussutissarsiuutitut akuerisaanerulersissinnaanera pillugu apeqquteqaat aallaavigalugu oqallittoqarmissaanik Inatsisartuni ilaasortap Aqqalu Jerimiassenip Atassummeersup siunnersuutaanut Naalackersuisut sinnerlugit qujarusuppunga.

Eqqumiitsuliornerup inuussutissarsiuutinngorsinnaaneranut tunngatillugu apeqqummik soqutiginaatilimmik siunnersuuteqartoq saqqummiussaqqarpoq. Eqqumiitsulioriaatsini tamani eqqumiitsuliullaqqissunik peqarpugut, Naalackersuisullu tamakkununga atugassarititaasut tapiissuteqartarnermullu aqqissuussinerit tamakkiisuunissaannik soqutigisaqqarput.

Nuannaarutigeqisannik Kalaallit Nunaanni Eqqumiitsuliornermut Aningaasaateqarfik pillugu Nalunaarut Naalackersuisuninngaanniit aggustimi 2021-mi akuersissutigineqarpoq, taamaalineranilu Kalaallit Nunaanni eqqumiitsuliornermut aningaasaateqarfiup siulluip pilersinnissaa aallartinneqarpoq. Siulersuisut siorna septembarimi ataatsimiittoqarnerani inissitsiterput, januaarillu aallaqqaataani 2022-mi atuutilerlutik. Naalackersuisut neriuuteqarluarput, aningaasaateqarfiullu eqqumiitsuliornermut iluaqutaallualernissaa ilimagilluinnarlugu. Naalackersuisut eqqumiitsuliornermut aningaasaateqarfik suleqatigiumavaat eqqumiitsuliornermut tapiissuteqartarnermik aqqissuussinerit naleqqussarneqarnissaat pisariaqassappat. Tamanna ilaatigut isigineqassaaq naalackersuinikkut anguniakkaniit, eqqumiitsuliorneq annertunerujartortumik akuerineqassasoq inuussutissarsiuutitut, taamalu eqqumiitsuliornermut amerlanerusut inuussutigisinnaasaattut.

2022-mut aningaasanut inatsisissatut siunnersuutip suliarineranut atatillugu 2022-mi 2023-milu kulturi oqaatsillu pillugit isumasioqatigiissitsinissap ingerlannissaanut Naalackersuisut aningaasaliissutissanik siunnersuuteqarput. Ilaatigullu eqqumiitsuliornermut kulturimullu suliassaqqarfimmi killiffik aammalu suliassaqqarfiup iluani ineriartortitsiffiusinnaasut pillugit

oqallittoqarnissaa siunertaralugu kulturi pillugu isumasioqatigiissitsinissanut soqutigisallit attuumassutillit katersuutsinnissaannik Naalakkersuisut kissaateqarput. Isumasioqatigiissitsinerit eqqumiitsuliornerup inuussutissarsiutitut siuarsaaffiginissaannik qitiutitsiffiunissaat eqqarsaataavoq.

Eqqumiitsuliortut allat assigalugit eqqumiitsuliortut inuussutissarsiummik ingerlatsisutut akuerineqarnissaat Naalakkersuisut isumaqatigisorujussuuat. Sapinngisamik inuussutissarsiutinik amerlasuunik assigiinngisitaartunillu peqarnissarput pingaaruteqarpoq. Taamaammallu Nunatsinni inuussutissarsiutigalugu eqqumiitsuliortuusinnaaneq ajornannginnerusariaqarpoq.

Nunarput tamaat isigalugu, kisiannili aamma inunnut ataasiakkaanut eqqumiitsuliornermik ingerlataqartunuinnaanngitsoq aammali eqqumiitsuliortunik pikkorissunik pissarsisartunut tunngatillugu, eqqumiitsuliorneq pingaaruteqartorujussuullunilu inuussutissarsiorfiuvoq. Tamannalu inuussutissarsiutaavoq suleruluttarnissamik, piumassuseqarnissamik sulerusussusermillu piumasaqarfiusartoq.

Naalakkersuisut nipilersortartut ilinniartiffissaannik pilersinnissaanut periarfissanik misissuipput. Ilinniarnerup piginnaasanik pilersitsiffiusarnissaa, nunatsinnilu kommunini nipilersornermik ilinniartiffinni atorfinitsinneqarsinnaanermut periarfissaqarnissaa eqqarsaataavoq.

Tassunga atatillugu Naalakkersuisut allannguutissatut siunnersuut UKA 2022/129-mut tunngasoq innersuukkusupparput, imatut oqaasertaqartoq: **“Naalakkersuisut akileraartarnermik nutarterinermut ilanngullugu, nipilersortartut eqqumiitsuliortullu isertaannik ajornannginnerusumik assigiiaarnerusumillu qanoq pisariaqartitsinermik misissuinissamut peqquneqarnissaat pillugu Inatsisartunut aalajangiiffigisassatut siunnersuut”**.

Naalakkersuisut kalaallit eqqumiitsuliaannut eqqumiitsuliortunullu tunngatillugu nunarsuaq tamaat isigalugu eqqarsartoqartariaqartoq isumaqarput. Greenlit assersuutitut taaneqarsinnaavoq, taannalu kalaallit atuakkiaannut allaffiuvoq nunani allani kalaallit atuakkiaasa siuarsarnissaannik suliaqartoq. Taakkua oktobarimi 2021-imi Tysklandimi nunarsuaq tamakkerlugu atuakkianik saqqummersitsinermi peqataasimapput atuakkianillu toqqakkanik nunani allani saqqummersitsisarfinnut nittarsaassisimallutik, taamaaliornikkut kalaallit atuakkiaat nunat allamiut oqaasii assigiinngitsut aqputigalugit saqqummersinneqarsinnaassammata.

Tamatuma saniatigut eqqumiitsuliornermut tunngatillugu Canadamik suleqateqarnerulernissamut Naalakkersuisut sulissuteqarusupput.

Taamatut oqaaseqarlunga inersuarmi oqallittoqarluarnissaanut Naalakkersuisut qilanaarput.